

# 文殊師利發願經

東晉佛陀跋陀羅譯



南無本師釋迦牟尼佛

## 說明

本繁體校正版《文殊師利發願經》電子書，根據《永樂北藏》西土聖賢撰集，第 1328 部，東晉佛陀跋陀羅譯《文殊師利發願經》原藏影印本校正，句讀僅供參考。

本電子書是免費結緣品，特此說明。

仁慧草堂

二〇二〇年七月



掃碼關注仁慧草堂微信公眾號

## ●起誦儀

### 香讚

(一徧)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

### 淨口業真言

(三徧)

唵. 修唎. 修唎. 摩訶修唎. 修修唎. 薩婆訶.

### 淨三業真言

(三徧)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

### 安土地真言

(三徧)

南無三滿多. 母馱喃. 唵. 度嚕度嚕. 地尾. 娑婆訶

## 普供養真言

(三徧)

唵. 誚誚曩. 三婆嚩. 鞞日囉斛.

南無本師釋迦牟尼佛 (合掌三稱)

## 開經偈

(一徧)

無上甚深微妙法 百千萬劫難遭遇  
我今見聞得受持 願解如來真實義

# 文殊師利發願經

東晉佛陀跋陀羅譯<sup>1</sup>

身口意清淨	除滅諸垢穢
一心恭敬禮	十方三世佛
普賢願力故	悉覩見諸佛
一一如來所	一切刹塵禮
於一微塵中	見一切諸佛
菩薩眾圍繞	法界塵亦然
以眾妙音聲	宣揚諸最勝
無量功德海	不可得窮盡
以普賢行力	無上眾供具
供養於十方	三世一切佛
以妙香華鬘	種種諸伎樂
一切妙莊嚴	普供養諸佛
我以貪恚癡	造一切惡行
身口意不善	悔過悉除滅
一切眾生福	諸聲聞緣覺
菩薩及諸佛	功德悉隨喜
十方一切佛	初成等正覺

<sup>1</sup> 麗本：東晉天竺三藏佛陀跋陀羅譯

我今 <sup>2</sup> 悉勸請	轉無上法輪
示現涅槃者	合掌恭敬請
住一切塵劫	安樂諸群生
我所集功德	迴向施眾生
究竟菩薩行	逮無上菩提
悉供養過去	現在十方佛
願未來世尊	速成菩提道
普莊嚴十方	一切諸佛刹
如來坐道場	菩薩眾充滿
令十方眾生	除滅諸煩惱
深解真實義	常得安樂住
我修菩薩行	成就宿命智
除滅一切障	永盡無有餘
悉遠離生死	諸魔煩惱業
猶日處虛空	蓮華不著水
遍遊十方土 <sup>3</sup>	教化諸群生
除滅惡道苦	具足菩薩行
雖隨順世間	不捨菩薩道
盡未來際劫	具修普賢行
若有同行者	願常集一處

<sup>2</sup> 麗本：令；永樂北藏本及龍藏本：今

<sup>3</sup> 麗本：遍行遊十方；永樂北藏本及龍藏本：遍遊十方土

身口意善業	皆悉令同等
若遇善知識	開示普賢行
於此菩薩所	親近常不離
常見一切佛	菩薩眾圍繞
盡未來際劫	悉恭敬供養
守護諸佛法	讚歎菩薩行
盡未來劫修	究竟普賢道
雖在生死中	具無盡功德
智慧巧方便	諸三昧解脫
一一微塵中	見不思議刹
於一一刹中	見不思議佛
見如是十方	一切世界海
一一世界海	悉見諸佛海
於一言音中	具一切妙音
一一妙音中	具足最勝音
甚深智慧力	入無盡妙音
轉三世諸佛	清淨正法輪
一切未來劫	能悉 <sup>4</sup> 作一念
三世一切劫	悉為一念際
一念中悉見	三世諸如來
亦普分別知	解脫及境界

<sup>4</sup> 麗本：悉能；永樂北藏本及龍藏本：能悉

於一微塵中 出三世淨刹  
一切十方塵 莊嚴刹亦然  
悉見未來佛 成道轉法輪  
究竟佛事已 示現入涅槃  
神力遍遊行 大乘力普門  
慈力覆一切 行力功德滿  
功德力清淨 智慧力無礙  
三昧方便力 逮得菩提力  
清淨善業力 除滅煩惱力  
壞散諸魔力 具普賢行力  
嚴淨佛刹海 度脫眾生海  
分別諸業海 窮盡智慧海  
清淨諸行海 滿足諸願海  
悉見諸佛海 我於劫海行  
三世諸佛行 及無量大願  
我皆悉具足 普賢行成佛  
普賢菩薩名 諸佛第一子  
我善根迴向 願悉與彼同  
身口意清淨 自在莊嚴刹  
逮成等正覺 皆悉同普賢  
如文殊師利 普賢菩薩行  
我所有善根 迴向亦如是



三世諸如來 所歎迴向道  
我迴向善根 成滿普賢行  
願我命終時 滅除<sup>5</sup>諸障礙  
面見阿彌陀 往生安樂刹<sup>6</sup>  
生彼佛國已 成滿諸大願  
阿彌陀如來 現前授我記  
嚴淨普賢行 滿足文殊願  
盡未來際劫 究竟菩薩行

文殊師利發願經

<sup>5</sup> 麗本：除滅；永樂北藏本及龍藏本：滅除

<sup>6</sup> 麗本：國；永樂北藏本及龍藏本：刹

## ● 結誦儀

### 補闕真言

(三徧)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛拏. 吽. 潑抹拏. 娑  
婆訶.

### 補闕圓滿真言

(三徧)

唵. 呼嚧呼嚧. 社曳穆契. 莎訶

### 普回向真言

(三徧)

唵<sup>一</sup>娑摩囉<sup>二</sup>娑摩囉<sup>三</sup>彌摩曩<sup>四</sup>薩哈<sup>呼馬切</sup>囉<sup>五</sup>摩訶<sup>爻上聲</sup>咱<sup>六</sup>  
哈囉吽<sup>六</sup>

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無文殊師利菩薩摩訶薩 (合掌三稱)

南無護法諸天菩薩 (合掌三稱)

## 禮佛發願文

(一徧)

歸命十方調御師 演揚清淨微妙法  
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤，仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

## 迴向偈

(一徧)

願以此功德 莊嚴佛淨土  
上報四重恩 下濟三途苦  
若有見聞者 悉發菩提心  
盡此一報身 同生極樂國

十方三世一切佛。一切菩薩摩訶薩。摩訶般若波羅蜜。

## 三皈依

(一徧)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙。和南  
聖眾。



此咒置經書中可滅誤跨之罪

南无护法韦驮尊天菩萨

